

# Pas

Pasku i Aña Nobo ta nèt tras di lomba. Talbes na temporada aki di aña nos ta tende e palabra “pas” mas ku tur otro tempu. Mensahenan komuniká via korant, televishon i radio ta enfatisá pas. Na misa hende ta duna otro “pas”. Asta enemigunan den guera sa pone un paro na nan hostilidadat pa sikiera dia di Pasku.

Hende ta anhelá pa pas. Ma mundu konosé masha poko pas. Mas ku 20 aña pasá un persona a kalkulá ku desde aña 3600 B.C. mundu konosé solamente 292 aña di pas. Na mesun tempu mundu a eksperensiá 4.531 guera ku a kousa 3.640.000.000 morto. Gustave Valbert a skirbi ku entre 1500 B.C. i 1860 A.D. mas ku 8000 tratado di pas permanente a wòrdu firmá. Pa averahe nan a dura solamente dos aña. El a kalkulá ku pa kada 13 aña di guera, mundu konosé solamente 1 aña di pas.

Nos ta papia masha bunita tokante pas. Ma nos di bèrdat konosé pas? Na nos islanan, tin tur klase di intrankilidadat i “guera” politiko, sindikato, ekonómiko, kriminal, èts. Kolega i bisina ta bringa ku otro, i asta hopi famia ta eksperensiá poko pas. Tantu hende no tin pas den nan mes bida

**Echu ta ku hende lo no—NO POR—konosé pas bèrdadero te ora ku nan ta haña pas ku Dios!** Beibel ta papia kla tokante hende pekador: “*e kaminda di pas nan no konosé. ‘No tin pas pa e malbadonan,’ mi Dios ta bisa*” (Romanonan 3:17; Isaias 57:21). Tur hende ta nase den un kondishon di guera kontra Dios. Hende ta preferá hasi loke nan mes ke, haña nan propio gana, sigui nan mes kaminda; nan no ke obedesé Dios. **Nan ta biba den rebeldia kontra Dios, e Uniko ku por duna pas bèrdadero!** Anto nan ke sa ku nan por tin pas? No por!

Ma Kristo a “*hasi pas kaba dor di e sanger di Su krus*” (Kolosensenan 1:20). Dor di Kalvario, Dios ta ofresé un tratado di pas ku abo. Bo por rekonosé ku bo ta biba den enemistat kontra Dios i someté na Su kondishonnan di pas. Òf bo por rechasá Su oferta. **Ma ta solamente dor di Hesus ku hende por tin pas ku Dios.** “*...nos tin pas ku Dios dor di nos Señor Jesu-Cristo*” (Romanonan 5:1).

Ora bo ta haña pas ku Dios, e ora ei numa bo tin un fundeshi sólido riba kua e por tin pas ku otro hende. Bo no por tin pas bèrdadero ku hende si e Prens di Pas no ta reina den bo biba.

Nos tur sa ku nos mester “*Biba na pas ku otro*” (1 Tesalonisensenan 5:13). Ma tin hende ku ta hasié impusibel pa biba na pas ku nan. Dios sabiendo esei a bisa, “*Si ta posibel, asina leu ku ta dependé di boso, sea na pas ku tur hende*” (Romanonan 12:8). Segun e teksto aki, abo mester hasi máximo esfuerso pa biba na pas ku tur hende. Hopi bes esei ke men ku bo tin ku baha kabes p’è, atmití bo fout ku un aktitut umilde. Ma si bo ta hasi maksimo esfuerso ku un bon aktitut, i tòg e no ke pordoná òf lubidá e klèsh, bo no por kambia e situashon. Ma bo por tin pas mental apesar di e manera ku e ta tratábo si bo ta trata e persona ku kariño tòg.

Pas mental tambe ta algu ku Hesus so por duna. Hesus a bisa, “*Pas Mi ta laga pa boso; Mi pas Mi ta duna boso; no manera mundu ta duna, Mi ta duna boso. No laga boso kurason bira intrakil, ni lagu’é tene miedu*” (Juan 14:27).

**Esaki ta un pas ku bo por tin apesar di sirkunstansianan fèrfelu.** Apòstel Pablo a skirbi, mientras e tabata será den prizon, “*No preokupá pa nada; ma den tur kos, pa medio di orashon..ku gradisimentu, laga boso petishonnan ta konosí dilanti di Dios. I e pas di Dios, ku ta surpasá tur komprendementu, lo warda boso kurason i boso mente den Cristo Jesus*” (Filipensenan 4:6-7). Si den orashon bo ta pone bo karganan mental riba Dios i ta desaroyá un aktitut di gratitut bo por gosa pas mental.

Deseando bo un aña gosando bèrdadero pas di Dios!